

Attualità - Giupulitica - Ecunumia - Cultura

"Parchi hè viva a nostra lingua, pudemu amparà cun ella !"

Pierre Joseph Proudhon

Scola : Sucialisimu libartariu, Anarchisimu, Sucialisimu

Idei rimarchevuli : Anarchia, Mutuellisimu

Influnzatu da : Hegel, Saint-Simon, Stirner, Rousseau, Aristote, Louis Blanc, Ciceronu.

Vita hè pinsamentu di Pierre-Joseph Proudhon

Avemi ghjà parlatu di Milton Friedman, di Keynes, ma dinò di a teuria suciologica di Durkheim, par allargà stu fonti in i scenzi icunomici è suciali nantu à Tempi, vi prisintemi oghji una biugraffia di Pierre-Joseph Proudhon, è una spicazioni di i so tesi principali.

Pierre-Joseph Proudhon hè natu u 15 di ghjinnaghju di u 1809 in Besançon è mortu in u 1865 in Parigi. Hè statu un polemista, ghjurnalista, icunomista, filosofu è suciologu francesu. Faci parti di i fundatori di l'anarchisimu. È l'unicu teoricu rivuluzionariu ll'XIXesimu seculu di ceppu operaiu.

Hè un pinsatori di u sucialisimu libartariu, fora di u Statu, partigianu di u mutuellisimu, di u federalisimu, è u primu à richjamassi anarchistu in u 1840. L'anarchisimu ùn hè micca u disordini in l'idea di Proudhon, dici : *"a libartà hè anarchia, postu chì ùn adimetti micca u governu di a vulintà, ma solu l'autorità di a leggi, vali à di di a necessità"* (1).

In u 1840, publicheghja un libru impurtanti intitulatu *Chì cosa a pruprietà?* è in u 1846 a so opara maggiori *U Sistema di i cuntradizioni icunomici o Filosofia di a miseria*, à cui Karl Marx hà rispostu cù u testu *Miseria di a filosofia*. Anì avutu una currispundenza ricca.

In u 1847, si stalla in Parigi è diveni ghjurnalista puliticu. Particpeghja à a Rivuluzioni di u 1848, hè elettu diputatu sucialistu di a Custituanti. Criticheghja di manera virulenti u governu di a II^a Ripublica, circa à prumova u so mudellu di riforma di u creditu, è prova di metta in piazza à so "Banca di u populu". I ghjurnali par i quali Proudhon scrivi sò tutti stati pruibiti, iddu stessu hè statu incarceratu da u 1849 à u 1852 par "dilittu di stampa" (offesa à u Prusidenti di a Ripublica).

Sott'à u Sicondu Imperu (1852 – 1870), hè ubbligatu d'isiliassi in Belgica dopu à a publicazioni di u so libru *Novi Principii di a filusuffia pratica* in u 1858. Benefizieghja di l'amnistia in u 1860 è volta in Francia. Di pettu à i cuntradizioni di l'icunumia (macchinisimu chì libareghja l'operaiu d'una parti di u travaddu ma chì crea disoccupazioni), abbanduneghja l'idea di rivuluzioni par prupona un'antra via : **l'anarchisimu**. Difindeghja anzituttu a **libaratà**

individuali, ch'hà da essa cunsarvata contru à tutti i forzi duminanti : a Chjesa, u Statu, u cintralisimu, a duminazioni di l'operai ecc. Par Proudhon, l'interissu ghjinirali o a ghjustizia suciali ùn sò micca raghjoni sufficienti par metta di cantu l'individuu.

L'aviami ghjà capitu cù a risposta di Marx à u so *Sistema di i cuntradizioni icunomici o Filosofia di a miseria* (1846), i dui pinsatori si sò opposti nantu à parecchi punti, par asempiu Proudhon s'hè oppostu à u culletivisimu di Marx, difendendu un **libaralisimu individualistu**. Riponi u sucialisimu utopicu (2) com'è u capitalisimu. U so cumbattu contru à u cintralisimu è à prò di u mutuellisimu li fà sviluppà u cuncettu di **federalisimu auto-ghjestunariu**. U so sucialisimu si rivindicheghja d'un latu **sciintificu** (3), pidendu a forma di un'anarchia pusitiva.

Un istudiu praticu : Chì cosa hè a pruprietà ? (1840)

Da issa pubblicazioni, avemi ritinutu una sola frasa, mali capita, **“a pruprietà hè una arrubera”**. A noscia rigori ci ubblica a ripiddà una citazioni più larga, è dinò di spiicà ciò ch'iddu hà vulsutu di micca cù una frasa ma cù u libru sanu. Infatti, ùn semi micca chivi par fà pulitica, invece vulemi capiscia l'imbuschi, i cuntradizioni, i finalitai di l'ideulugii.

Anzitutto ripidemi un strattu più largu :

« *S'è aviu da risponda à a quistioni siguenti : chì cosa hè a schjavitù ? è chì rispondissi : ghjè l'ammazzamentu, u me pinsamentu sarebbi prima cumprumessu. Ùn avariu micca bisognu di un discorsu longu par muscià chì u puteru di piddà à l'omu u spirdu, a vulintà, a parsunalità, hè un puteru di vita è di morti, è chì fà l'omu schjavu, ghjè ammazzallu. Parchi, allora, à quidda altra dumanda : chì cosa hè a pruprietà ? ùn pudessi risponda a stissa cosa : ghjè l'arrubera, senza avè a certitudini d'ùn essa intesu, benchi issa siconda prupusizioni ùn s'ghi solu a prima trasfurmata ? » (4).*

Dunca, chì significheghja in u sensu di Proudhon quidda arrubera ? Proudhon parti di **l'impresa** com'è urganisazioni industriali di rifarenza. Ghjè impurtanti parchi à quist'epica di sviluppu di u capitalisimu, s'accillireghja u rincu di l'agricultura, ma dinò a trasfurmazioni di i primi provi d'industrialisazioni (manufatturi schjattati è cuncentrati ecc.) cù a nascita di una classe **d'operai** chì si didichjehghjani di manera unica à u travaddu in usina. In una impresa, i lavuratori producini più (di manera cullittiva) chì s'iddi travadassini individualmenti. Un individuu ùn pò micca fà in deci ori di travaddu ciò chì deci facini in un'ora. A forza cullittiva, ind'u travaddu suciali, pruduci più cà u travaddu individuali (pudemi pinsà à l'asempiu di una petra di parecchi tonni : cent'omi poni spiazziàlla, un omu ùn pudarà ancu s'è li demi un tempu centu volti più impurtanti). Eppure, u capitalistu paga l'operaiu di manera individuali, in quistu sensu **“arrubeghja”** u **soprapiù** di valori criatu colpu à l'organisazioni cullittiva. A pruprietà privata hè dunca una appropiazioni da un individuu solu di una “opara cullittiva” par Proudhon.

« *U capitalistu, si dici, hà pagatu i ghjurnati di l'operai ; par essa esattu, bisogn' à di chì u capitalistu hà pagatu altrettantu volti una ghjurnata ch'iddu hà impiegatu operai ogni ghjornu, ciò ch'ùn hè assulutamenti micca a stissa cosa. Infatti, issa forza immensa chì risulteghja di l'unioni è di l'armunia di i travagliatori, di a cunvergenza è di a simultaneità di i so sforzi, ùn l'hà micca pagata. Dui centu granateri ani in qualchì ora arrizzatu l'ubelisca di Louqsor nantu à a so basa. [...] Eppure, sò stati pagati com'è s'è u travaddu fubbi statu*

individuali. Infatti, un disertu da metta in cultura, una casa da custruiscia, una manufattura da splutà, hè l'ubelisca da alzà, hè una muntagna da mova. A più piccula opara, u più minusculu stabilimentu, a missa in ballu di a più debuli industria, dumanda l'unioni di lavori è talenti cussì diversi, chì un omu ùn ci si basterà mai. Hè stunenti ch'ùn l'aghi rimarcatu l'icunumisti. Femi dunca a bilancia frà ciò ch'hà ricivutu è ciò ch'hà pagatu u capitalistu. » Pierre-Joseph Proudhon, Chì cosa hè a pruprietà ?, capitulu. III.

U vidimi cù issi stratti, a so difinizioni di a pruprietà chì hè arrubera hè bedda precisa, ùn hè micca u fattu di pusseda calcosa in se chì hè cundannatu ma a differenza trà ciò chì u capitalistu guadagneghja da u travaddu ll'operai è ciò ch'iddu paga par ritribuisciali. In fatti, Proudhon furmuleghja una *tesa / antitesa*. Affirmeghja chì una certa forma di pruprietà “hè arrubera”, è faci l'apulugia di u picculu pruprietariu, quandu **a pruprietà hè ligata à l'usu di una cosa**. Ci raminteghja parechji ideii di l'Antichità, da a riflissioni nantu à a ricchezza ind'a Citai di Platon fin'à a *crematistica* aristoteliciana, ripiddata dopu da San Tumasgiu d'Acquin. Proudhon spiega chì i mezi di pruduzioni ani da essa ditinuti da quiddi chì pruducini. Faci dunca una siparazioni trà **pussessioni** è **pruprietà**.

Proudhon, di ceppu puvaru è analfabetu, hè divintatu un intelletuali framezu à i più influenti di u so seculu, hè statu attaccatu, cundannatu, minacciatu da i sfarenti puteri di Francia. Maxime Leroy (1873 – 1957), storicu è ghjurista francesu, dici (5) chì Proudhon ind'a so opara circaia **l'ultima tappa di l'ugualità**. U Vanghjiliu avia postu l'ugualità di tutti davant'à Diu, u XVI^{esimu} è XVII^{esimu} secula davant'à a raghjoni, u 1789 davant'à a leggi. Infini, iddu voli l'ugualità davant'à i fatti icunomici. A pruprietà sarebbi dunca un ostaculu da supranà par raghjunchja quidd'ubbiattivu.

Opari principali

- *Chì cosa hè a pruprietà ? o Ricerca nantu à u principiu di Dirittu è di Guvernu* (1840)
- *Sistema di i cuntradizioni icunomici o Filosoffia di a miseria* (1846)
- *Manuali di u speculatori à a Borsa* (1853)
- *Di a ghjustizia in a rivuluzioni è ind'a Chjesa* (1858)
- *A Guerra è a Paci* (1861)
- *Di a capacitai pulitica di i classi operai* (1865)
- *Di u principiu fidirativu è di a nicissitai di ricustituscia u partitu lla rivuluzioni* (1863)
- *Currispundenzi* (1875)

(1) *Prima mimoriu di a Storia*, 1840.

(2) Saint-Simon, Owen, Fourier, Cabet, Buchez. In Inghilterra è in Francia.

(3) “A suvrantà di a vulintà abbanduneghja di pettu à a suvrantà di a raghjoni, è compierà smariscendu ind'un sucialisimu sciintificu” In *Cosa hè a pruprietà ? o Ricerca nantu à u principiu di Dirittu è di Guvernu* (1840).

(4) Ibid.

(5) Maxime Leroy, *i precursori francesi di u socialismu : da Condorcet à Proudhon*, Idizioni di u Tempu prisenti, 1948.